

**Talamdan sa
Mga Mensahe alang sa Full-time Training
sa Spring Term sa 2024**

**LINANGKOB NGA HISGOTANAN:
ANG MAHINUNG DANONG MGA PUNTO SA KAMATUORAN SA MGA SULAT NI PABLO—
IKADUHANG CORINTO**

Mensahe 3

Mga Tigdala-og-Incienso nga Magsabwag sa Alimyon ni Cristo ingon nga Mga Embahador ni Cristo

Basahong Kasulatan: 2 Cor. 2:12-15; 5:20

- I. Ang mga ministro sa bag-ong pakigsaad mga tigdala-og-incienso nga magsabwag sa alimyon ni Cristo—2 Cor. 2:12-15:**
- A. Isip mga binihag ni Cristo sa madaogong prosesyon Niya, mga tigdala-og-incienso sab ta; pinaagi nato ipadayag sa Dios ang alimyon sa pagkaila ni Cristo sa tanang dapit (v. 14); sa pagkatinuod, ang pag-sabwag sa incienso ni Cristo pagkinabuhi man Kaniya (Fil. 1:19-21a).
 - B. Kay nabihag, nabuntog, napanag-iy, ug nabatonan na man ta ni Cristo, may kagawasan na Siya nga mosurop kanato ug maghimo natong alimyon Niya (2 Cor. 2:15); aron mahimong alimyon ni Cristo, kinahanglan nga pratikal tang mahimong mga binihag Niya, nga nakaamgo nga ang tinuod nga mga pagdaog nato mao ra ang mga pagdaog ni Cristo kanato ug ang mga pagpildi Niya kanato mao ra ang tinuod nga mga pagdaog nato (vv. 12-15, itandi sa 10:5).
 - C. Sa kapulihay ang mahigugmaong nagtinguha sa Awit sa Mga Awit nahimong pribadong tanaman ni Cristo, nga napuno sa alimyon ni Cristo—4:12, 15:
 1. Kay pribadong tanaman man ta ni Cristo, nagpahimulos ta ni Cristo aron makapahimulos ug magtagbaw Siya; ang Ginoo maoy tanan kanato aron makapahimulos Siya sa tanan gikan nato—1:12-14; 4:12-14; 5:1:
 - a. Sa dihang gidapit sa matinguhaon ang Ginoo nga moadto sa Iyang tanaman, nitubag ang Ginoo; bisan tuod iya ta sa Ginoo, sa gihalad na nato ang atong kaugalingon Kaniya, ang makanunayong paghalad maoy magdala sa Ginoo nganha sa atong tanaman—4:16b; 5:1.
 - b. Sagad nga napalgan sa sinati na nga mga magtutuo nga mas lisod ang ulahing paghalad kaysa unang paghalad, apan mas mahimayaon kini kaysa una; kining paghalara ray makahatag sa Ginoo sa bunga sa Iyang paghago—Gen. 2:7; Lev. 6:12-13.
 2. Ingon nga pribadong tanaman ni Cristo, niampo sa ingon niini ang mahigugmaong nagtinguha ni Cristo—"Pagmata, O amihan; / Ug ari, O habagat! / Huypi ang akong tanaman: / Pagulaa ang mga igpahumot niana"—A. A. 4:16a:
 - a. Ang amihan (bugnaw, kusog, ug hilabihan katugnaw) ug ang habagat (init, malumo, ug makalunhaw) duha ka managlahing palibot nga gigamit sa Ginoo sa pagbansay sa mga magtutuo aron makapahimulos sila Niya isip sekretong pagkakontento nila—Fil. 4:11-13, 6-7; 1:20.
 - b. Nakaamgo ang nagtinguha sa Ginoo nga naggikan ang tanang problema sa sulod ug dili sa gawas; nasayod siya nga basta mapuno siya sa Espiritu nga presensya sa Tulo-usang Dios, malipayon siyang makakinabuhi ug makapadayag ni Cristo sa bisan unsang palibot.
 - c. Andam nga magpaalimyon sa kahumot ni Cristo ang mga ministro ni Cristo, ang mga nahigugma ni Cristo, sa tanang sirkumstansya; kon dunay kahumot sa sulod, makapaalimyon lang niini ang mga sirkumstansya sa gawas—4:11-12.
 - D. Ang lihok sa mga apostol sa pagpangalagad nila alang ni Cristo pagsaulog man sa pagdaog ni Cristo; madaogong prosesyon kini nga nagpadayon gikan sa usa ka dapit ngadto sa laing dapit nga gipangu-nahan sa Dios; ning madaogong prosesyon, nanghimatuod si Pablo nga ang Dios maoy "nagsabwag sa alimyon sa pagkaila Kaniya pinaagi nato sa tanang dapit"—2 Cor. 2:14:

1. Diha sa madaogong prosesyon ni Cristo ang kahumot Niya nga gihalad ngadto sa Dios mao ang alimyon sa kinabuhi nga nisangpot sa kinabuhi alang sa uban sa paagi sa kaluwasan ug alimyon sa kamatayon nga nisangpot sa kamatayon alang sa uban sa paagi sa pagkalaglag—v. 15.
2. “Segun sa paggamit sa Griyego, magkalambigit nga mga pulong ang *alimyon* ug *pagkaila*, mao nga gisimbolohan ang pagkaila ni Cristo og alimyong nagpaambit sa kinaiya ug pagkaepektibo niini pinaagi sa buhat sa apostol” (Vincent)—v. 14, nota 4.
3. Ang mga nagsabwag sa alimyon ni Cristo namulong diha ni Cristo samtang namulong si Cristo diha nila aron matukod ang Lawas ni Cristo—vv. 16-17; 13:3.
- E. Ingon nga mga tigdala-og-incienso nga nagsabwag sa alimyon ni Cristo, kita ang mga embahador ni Cristo nga naay ingon niini nga mga katakos—5:20:
 1. Wala ta magkinabuhi pinaagi sa pagkamao nato o sa mahimo nato, kondili pinaagi sa kinabuhing dili mamatay, nga mao si Cristo mismo—v. 4.
 2. Desidido ta nga makaangkon sa dungog nga gikahimut-an ni Cristo—v. 9.
 3. Gipugngan ta sa gugma ni Cristo—v. 14.
 4. Nakaila ta sa uban sumala ni Cristo diha sa espiritu—v. 16; A. A. 7:4.

II. Ang halad nga sinunog “kahumot nga makatagbaw ni Jehova” (Lev. 1:9); ang Hebreohanong mga pulong nga gihubad og “kahumot nga makatagbaw” sa linetra nagpasabot og “alimyon sa pahulay o katagbawan”; ang kahumot nga makatagbaw alimyon nga nagdalag katagbawan, kalinaw, ug pahulay nga pagpahimulos sa Dios—Num. 28:2; itandi sa 2 Cor. 2:14-15:

- A. Ang halad nga sinunog naghulagway ni Cristo (Lev. 1:1-17) sa duha ka paagi: (1) Sa pagkinabuhi Niya sa kinabuhing hingpit ug bug-os gyong alang sa Dios ug sa pagtagbaw sa Dios (vv. 3-4a, 9; Juan 5:19, 30; 6:38; 7:18; 8:29; 14:24) ug (2) sa pagka-kinabuhi Niya nga makapakinabuhi sa katawhan sa Dios nianang pagkinabuhia (Efe. 5:2; 2 Cor. 5:14-15; Gal. 2:19-20).
- B. Ang bugtong kinabuhi nga makapahimuot sa Dios mao ang kinabuhing pagsubli sa kinabuhing gikinabuhi ni Cristo dinhi sa yuta; kinabuhi kini nga nagsinati ni Cristo sa Iyang mga kasinatian isip halad nga sinunog—Lev. 1:9; Juan 8:29; 2 Cor. 5:9; Efe. 4:20-21.
- C. Ang laking karnero sa halad nga sinunog nagtimaan sa lig-ong Cristo nga atong halad nga sinunog sa pagpangako nato sa pagkasacerdote nato sa Bag-ong Tugon (Lev. 8:18); kining halara, ang laking karnero sa paghalad (pagkonsagrar) (v. 22; 7:37 ug nota 1), nagpahinumdom nato nga isip mga mag-aalagad kinahanglan nga bug-os gyod ta alang sa Dios, apan dili man ta bug-os; mao nga himoon gyod natong halad nga sinunog si Cristo adlaw-adlaw alang sa sacerdotehanong pag-alagad nato (6:12; itandi sa Heb. 10:5-10).
- D. Ang pagtapion sa mga kamot sa ulo sa halad nga sinunog nagtimaan sa pagkausa nato ni Cristo; sa pagtapion nato sa atong mga kamot ni Cristo nga halad nato, nadugtong ta Niya, ug nausa Siya ug kita—Lev. 1:4a.
- E. Nianang pagkausaha gipangako Niya ang tanan natong kaluyahon, mga apan, ug mga sayop, ug naatoa ang tanang maayong gawi Niya; nagkinahanglan kini nga gamiton nato ang atong espiritu pinaagi sa hustong pag-ampo aron mausa ta Niya sa kasinatian gyod—1 Cor. 6:17; 2 Cor. 5:21; Gal. 2:20a.
- F. Sa pagtapion nato sa atong mga kamot ni Cristo pinaagi sa hustong pag-ampo, molihok ug mobuhat dayon sa sulod nato ang Espiritung taghatag-og-kinabuhi, nga mao si Cristo mismo nga gitapin-an nato sa atong mga kamot (15:45; 2 Cor. 3:6, 17), aron magkinabuhi sa sulod nato sa kinabuhing pagsubli sa kinabuhing gikinabuhi ni Cristo dinhi sa yuta, sa kinabuhi sa halad nga sinunog (Gal. 6:17).
- G. Himoon gyod natong halad nga sinunog nato si Cristo adlaw-adlaw (Num. 28:3-4; Lev. 1:2-4; 6:12-13; itandi sa 2 Tim. 1:6) aron masinati nato si Cristo sa Iyang mga kasinatian isip halad nga sinunog, dili moawat ni Cristo sa dayag kondili ikinabuhi Siya sa adlaw-adlaw natong kinabuhi—2 Cor. 5:14-15; Fil. 1:19-21; Buh. 27:22-25; 28:3-9; 1 Cor. 1:9.

III. Ang kahimoan sa paghigugma diha sa kinabuhi sa Lawas, ang lagsik nga grupo nga iglesiahanong kinabuhi, girepresentahan ni Maria, nga nahigugma sa Ginoo sa hingpit gyod ug nibubo sa giisip niya nga labing bililhon nganha sa Ginoo; duna siyay tibod nga alabastro nga napuno sa usa ka librang pahumot sa mahalon kaayong lunsayng nardo; sa gibuak niya ang tibod ug gibubo kini sa ulo sa Ginoo, “napuno sa kahumot sa pahumot ang balay”—Juan 12:2-3; Mar. 14:3; itandi sa A. A. 1:12:

- A. Giisip ni Maria nga labi pa kabililhon ug kahiligugmaon ang Ginoo kaysa bisan unsang butang; ang pagdihog nato sa Ginoo sa labing maayong gugma nato ug ang pagpaalimyon sa kahumot nianang gugmaha

sa kinabuhi nato sa tigom mao ang labing mahinungdanong pagpadayag, aspeto, ug kinaiya sa iglesia-hanong kinabuhi.

- B. Ang iglesia sa Juan 12:1-11 gipakasama sa balay nga napuno sa kabililhon, katam-is, ug kanindot sa kahumot sa igdihog nga gibubo nganha ni Ginoong Jesus.
- C. Giisip sa mga tinun-an nga pag-usik-usik ang halad sa gugma ni Maria ngadto sa Ginoo; apan, alang sa mga nahigugma Niya sa ingon niana, hingpit gyod Siyang hiligugmaon ug angayan sa ilang paghalad—Mat. 26:8-13; Juan 12:4-6.
- D. Sa nilabayng mga siglo linibolibo ka bililhong kinabuhi, mga mahal sa kasingkasing, tag-as nga posisyon, ug bulawanong kaugmaon ang “giusik-usikan” nganha ni Ginoong Jesus—ang gibubo nila Kaniya dili pag-usik-usik kondili humot nga panghimatuod sa Iyang katam-is.
- E. Nagtimaan ang tibod nga alabastro sa tawo nato sa gawas, nga buk-on gyod aron makagawas ang tawo sa sulod; nagbuhat ang Ginoo sa sulod nato ug nganhi nato sa daghan kaayong nagkalainlaing paagi sa tuyo nga madugmok ang kulonong sudlanan, ang tibod nga alabastro, ang makita nga kaha—2 Cor. 4:7; Juan 12:3, 24.
- F. Nagpahaluna ang Dios og palibot alang nato nga modugmok sa atong tawo sa gawas, maghimo sa tanang tawo, tanang hitabo, ug tanang butang nga “masigkatabang alang sa ikaayo”; nagpasabot ang “ikaayo” dinhi sa labi pa nga pagpakabaton natog Cristo, sa pagkaumol Niya sa atong pagkatawo, aron metabolico tang matransporma ug sa kaulahian masama sa Iyang dagway, sa dagway sa Anak sa Dios nga magdala nato ngadto sa hingpit nga pagkaanak—v. 29.
- G. Modugmok sa natural natong taras ug mga batasan ang pagdisiplina sa Espiritu Santo ug mohatod sa pag-umol sa Espiritu Santo diha sa pagkahamtong ug katam-is:
 - 1. Bisan unsa pa ta sa pagkahimugso nato, maayo ba o daotan, mapuslanon ba o dili, natural gyod ug hingpit nga makaulang sa pag-umol sa Espiritu Santo sa diosnong kinabuhi nganhi sa atong pagkatawo aron mahimo tang kahumot ni Cristo.
 - 2. Tungod niini, gub-on gyod ang natural natong kusog, natural nga kaalam, natural nga kaigmat, natural nga taras, natural nga mga kakulangan, natural nga maayong kagawian, ug natural nga mga kaayo, ug ang atong karakter ug mga batasan, aron maumol sa Espiritu Santo sa sulod nato ang bag-ong taras, bag-ong karakter, bag-ong mga batasan, bag-ong maayong kagawian, ug bag-ong mga kaayo.
 - 3. Aron matuman kining buhat sa pag-umol pag-usab kanato, nagbuhat ang Espiritu Santo sa Dios sa sulod nato aron maghayag, magdasig, manguna, ug magsurop nato sa diosnong kinabuhi; nagbuhat sab Siya sa atong palibot aron magpahaluna sa matag detalye, tawo, hitabo, ug butang sa atong sitwasyon aron maguba ang natural nga kita aron ipasama ta Niya sa dagway ni Cristo (v. 28).

IV. Makaamgo gyod unta ta nga tanang masinati nato dunay usa ra ka tuyo—aron makagula ang kinabuhi sa Dios pinaagi nato ug mapadayag dinhi nato; madugmok unta ang atong tawo sa gawas hangtod nga makagula ug mapadayag ang tawo sa sulod; bililhon kini, ug kini ang paagi sa mga sulugoon sa Ginoo. (Tan-awa ang importanteng mga kinutlo sa sunod nga panid.)

**Pakig-ambit kalabot sa Pagdugmok sa Tawo sa Gawas
aron Makagula ang Espiritu ug Mapadayag ang Dios**

Masayod gyod unta ta nganong gibutang ta sa Dios dinhi sa kalibotan. Gibutang ta Niya dinhi aron magmugnag kagutom ug kauhaw sa pagkamatarong diha sa mga makasasala, sa mga magtutuo, ug sa kalibotan ang presensya nato. Sa buhat nato, magmugna gyod tag kagutom diha sa uban. Duna gyod untay mysteryosong kalunhaw, gahom, til-og, ug sangkap sa sulod nato nga magtulod sa uban nga mangita sa Dios tungod sa presensya nato. Magtinguha gyod unta ang uban nga mangita sa Dios agig resulta sa pagkahinagbo ug pakigsultianay nila nato. Kon kanunay tang nakigkita ug nakigsultianay sa uban nga wala makamugnag tinguha alang sa Dios sa sulod nila, nagpasabot kana nga pakyas ta. Kon dili makamugnag kadakong kagutom sa sulod sa tawo ang pagbasa nato sa Biblia, pag-ampo, pag-alagad, ug pagsangyaw sa ebanghelyo, pakyas ang buhat nato. (*The Collected Works of Watchman Nee*, vol. 54, “The Breaking of the Outer Man and the Release of the Spirit, p. 238)

Giasoy 2 Hari 4 ang kalabot sa pag-abiabi sa Shunamitanhong babaye ni Eliseo; “Usa ka adlaw niana niagi si Eliseo sa Shunem; ug dunay dato nga babaye didto, nga namugos niya nga mokaon. Busa matag panahon nga moagi siya, mohapit siya ug mokaon didto. Ug niingon siya sa iyang bana, Nasayod ko karon nga balaang tawo sa Dios kining tawong sigeng moagi kanato” (vv. 8-9). Niagi si Eliseo sa Shunem; wala siya magmensahe o magmilagro; matag

panahon nga moagi siya, mohapit siya ug mokaon didto. Naila sa babaye nga tawo siya sa Dios tungod sa kinan-an niya. Kini ang nasilsil ni Eliseo sa hunahuna sa uban.

Karon pangutan-on gyod nato ang atong kaugalingon, “Unsa man ang nasilsil nato sa hunahuna sa uban? Unsa may nigula gikan nato?” Gisubli na nato pagsulti nga dugmokon gyod ang tawo sa gawas. Kon dili madugmok ang tawo sa gawas, ang tawo nato sa gawas ra ang masilsil nato sa uban. Matag kontak nato nila, dili maayong pagbati tingali ang masilsil nato nila nga nahigugma ta sa kaugalingon, kahiag uli, ug mapagarbohon. O masilsil tingali nato kanila nga maigmat ta ug maayo kaayo manulti. Malagmit masilsila nato sa uban nga buotan ta. Apan makatagbaw ba kini sa Dios? Natagbo ba niini ang panginahanglan sa iglesia? Wala matagbaw ang Dios, ug wala manginahanglan ang iglesia sa pagkabuotan nato.

...Kon wala madugmok ang atong tawo sa gawas, dili makagula ang espiritu nato, ug ang masilsil nato sa uban dili pagbati sa espiritu.

...Ang masilsil nato sa uban mao ang labing kusganong mga bahin nato”—(*The Collected Works of Watchman Nee*, vol. 54, “The Breaking of the Outer Man and the Release of the Spirit, pp. 238, 237)